

Lu dorifôre.

Gaston LUCY – Y.J.

Çut' anéye la, nu vla nin si lontimps k' ça, les djins ont sté coume an rèvolucion. On djot partout (et les gazètes à câzint tous les djoûs), k' i gn' avot vnu s' rabate ène walée du dorifôres sul payi et ku ces biêsses la astint dins l' cas d' anèyanti les cartouches (*p.de terre- tubercules*) dins tout l' payis à mwindjant les djon.nes cartouchîs (*p. de terre – plante*).

Dju m' va vz a raconter ène bèle alèz !

A mon-Idée, il avint mètu in vî coume êdant ou champète et il avot pris s' mèsti à keûr. Seûl'mint , il avot ène mwêje fame, nin mèyeuse ku ses vèjines et, à Mon-Idée, èn' ècart du Nayômé, is n'avint k'ène fontin.ne, et co lon, pouz aler laver les cayèts. (*linge*).

Person.ne n'avot jamwês vû la biêsse et on s' dumandot bin coumint k' ille ére. Çu smwin.ne là, dabant la dicâce ki tumot l' prèmî dimadje dabant les canicules, les fames lavint leûs cayèts al fontin.ne, a câzant du dorifôre. Iles astint agnoléyes dins leûs lavètes dabant l' batch et ça bërdèlot ferme, dju vz achûre.

- Dju n' sés nin si dju m' trompe, di-ile yène des fames, mês dju vins d' vèy ène biêsse, dju n' sé nin ç' ku c' est, ki moussot dins l' buchon du supine lallé et z-î sâtriker.

- Oh !, c'est rin, k' iles ont dit les ôtes, t' ârès vû èn' ojê, va : ène suprife. (*merle*).

- Dju n' sé nin, mês dju n' sus nin chûre et dj' ê bin l'idée d' araler.

La vlâ bin ki s' rulûve, ki tchèdje ses clik et ses clak dins la bërwète et k' arva.

Ça n' astot nin pou rachûrer les ôtes fames, ki sondjint toutes al nouvèle biêsse.

- Dju m' arva ossi, on n' sé nin ké biêsse ku ça pu z-èsse !

- Mi ossi, dit-ile ène trwâjime, dju n' sans k' des fames, don ! Sét-on jamwês !

I n' è wêre falu d' timp pou k' la fontin.ne su voûde et k' la pourcession d' bërwètes nu rinture a Mon-Idée.

Vous cåsèz d'in rafut dins l' culot ; ça è fwêt ku toutes les fames câzint assan.ne et l'vî champète k'avot acouru n'è rin compris à ç' k'iles racontint, tèlmint k'il oyot dèr.

Su nèveu, in djion.ne hêre ki choûtot ossi, lî è èspliké la spoûle.

- C'est bon, k'i dit, dju m' va rkê l' fusik, pîs dj' îrê tinde dulé l' batch. Prinds ène fon.ne, dit-i ou djon.ne oume. Tu vèrèz avu mi !

Il ont batu les abôrs dul fontin.ne sin rin vèy.

- Assiyans –nous la, dit-i l' vî, dju vons lignî la spine ; dju ratindrans k'ile ruvinje.

Çu djoû la, i s'ont passé d' marinde tous les deus, mês sul côp d' deus eûres, le djon.ne a-n è ralé. L' êdant-champète è co ratindu in bokèt pîs, i s'è dit : « Dju rvêrê dmwin. ». Jusse ou moumint k' i s' rulvot, il è arrivé in wiyyêt d'ér (*turbillon*) k'è fwêt tran.ner l' buchon et il è san.né ou vî ku yâk avot tumé du buchon. Il è couru vèy ; c' ére ène biêsse ki sayot du s' ravoler, ène biêsse coume i nn' avot co pont vû.

Ça r'san.not a ène baloûje (harnicotê), mês çu n' ére nin ène baloûje. Ça avot des lignes su les êles, mês nin la couleûr d'ène baloûje. –« Mètans-la toudi dins nosse bwèsse d'alumètes. Dju wêrans pus tard ! ». Pîs il è rintré.

- C'est nin l' tout, asteûre, Fât avèrti l' mayeur. Vins avu mi, dit-i à s' nèveu, et prinds z-à co èn' ôte avu ti.

Ça fwêt k'onz è vû nn' aler ou viadje, lu vî champète avu l'fuzik, lu nèveu avu la fon.ne et in gayouf avu in brigounê.

Su leu passadje, les djans k'avint dja yu vant dl' afwêre, les î dmandint kwè, mês zès n' ruspondint rin.

Arivés dlé l' mayeur, lu vî è raconté cè k' la fame avot crû vèy, les eûres k'il avint passé à tinde avu l' gamin et la drole du biêsse k'il avot trouvé.

Cand l' mayeur è oyu vû la biêsse, il l' è du côp r'counu. C'ére la min.me k'astot sur les papîs k'il avot oyu à matin. Çu n' ére nin ène balouje, mês in vrê dorifôre.

Lu mayeûr, k'avot yu des instruccions, è dné condjî ås afants dul comune pouz aler rouler les cartouchîres et ramasser toutes les biêsses k'on trouvrot, pou les foute ou feu et les grèyî.

On n' counichot nin co l' DDT, don adon. C'est insi ku lès prêmîres tchêsses ås dorifôres ont cminci.

Gaston LUCY.